



# IROMAG

*Odlazni studenti*



U OVOM BROJU

**KANTONALNO TAKMIČENJE  
IZ BOSANSKOG JEZIKA I  
KNJIŽEVNOSTI**

**UNICREDIT AKADEMIJA**

**BLS OBUKA**

**POLITIKA U ERI  
PODATAKA**

**STUDENSKA  
KONFERENCIJA 2026**

**24. MEĐUNARODNA MSA  
KONFERENCIJA ODRŽANA  
U BUDVI**

by IROUNMO

Kantonalno takmičenje iz bosanskog jezika i književnosti održano je 9. aprila 2026. godine na Fakultetu humanističkih nauka u Bosni i Hercegovini. Učenci srednjih škola takmičili su se u tri segmenta: istraživački rad, test znanja i prezentacija. U prvom segmentu učenici su birali jednu od deset ponuđenih tema i pripremali istraživačke radove, koje je žiri ocjenjivao prema unaprijed definisanim kriterijima. Test znanja realizovan je istog dana s početkom u 9 sati, a učenici su ga rješavali timski. Testovi su kodirani, nakon čega ih je žiri zajednički ocjenjivao. U završnom dijelu takmičenja učenici su prezentirali svoje radove, pri čemu su pokazali analitičke i komunikacijske vještine. Nakon zbrajanja bodova iz sva tri segmenta proglašeni su najuspješniji učesnici. JU Srednja škola Jablanica ostvarila je najbolji rezultat na testu znanja, dok je Druga gimnazija Mostar nagrađena za najbolji istraživački rad i prezentaciju. U ukupnom plasmanu prvo mjesto osvojila je Gimnazija Mostar, drugo mjesto pripalo je Drugoj gimnaziji Mostar, a treće mjesto zauzela je JU Srednja škola Jablanica.

# UNICREDIT AKADEMIJA

By IROUNMO

Na Ekonomskom fakultetu je 9. i 10. aprila 2026. godine održana UniCredit akademija za buduće poduzetnike. Dekan Ekonomskog fakulteta, Goran Ćurić, otvorio je događaj i u uvodnom obraćanju istakao značaj razvoja poduzetničkih kompetencija i praktičnih vještina kod mladih. Akademiji je prisustvovalo ukupno 50 učesnika, među kojima su bili studenti prve godine Ekonomskog fakulteta, kao i maturanti Srednje ekonomske škole Mostar. Tokom dvodnevnog programa učesnici su radili u timovima na razvoju poslovnih ideja, prisustvovali predavanjima te prezentirali svoje projekte pred stručnim žirijem. Na kraju programa žiri je odabrao pobjednički tim u sastavu: Faris Memić, Almedina Zilić i Yasir Ali, studenti Ekonomskog fakulteta, te Mahir Čevra i Farah Jušić, maturanti Srednje ekonomske škole Mostar. Pobjednički tim razvio je poslovnu ideju pod nazivom „Low-cost AR/VR rješenja za muzeje i škole“. Tokom završne ceremonije organizatori su dodijelili nagrade svim učesnicima i priznanja najuspješnijima.



# BLS OBUKA

By IROUNMO

U utorak, 21. aprila 2026. godine, Nastavnički fakultet organizovao je i realizovao obuku iz osnovne životne podrške (Basic Life Support – BLS), s ciljem unapređenja znanja i vještina studenata i nastavnog osoblja za reagovanje u hitnim situacijama. Tokom obuke učesnici su se upoznali s osnovnim principima prepoznavanja srčanog zastoja, kao i pravilnim izvođenjem kardiopulmonalne reanimacije (CPR). Poseban fokus stavljen je na pravovremenu reakciju i primjenu odgovarajućih postupaka do dolaska stručne medicinske pomoći. Obuka je imala praktičan karakter, omogućivši učesnicima da kroz simulacije uvježbaju naučene procedure i steknu dodatnu sigurnost u postupanju u stvarnim situacijama. Organizacijom ovakvih aktivnosti fakultet nastoji kontinuirano doprinositi razvoju korisnih i primjenjivih vještina kod svojih studenata i zaposlenika.



# POLITIKA U ERI PODATAKA

By IROUNMO

Dvodnevni događaj „Politics in the Era of Data: Precision Targeting and Strategic Identity Building“ održan je 15. i 16. aprila 2026. godine u amfiteatru Ekonomskog fakulteta, u saradnji sa Konrad Adenauer Stiftung. Prvog dana, 15. aprila, Aida Duratović vodila je interaktivnu radionicu usmjerenu na razvoj komunikacijskih vještina. Učesnici su unaprijedili javni nastup, aktivno slušanje i uvjerljivo izražavanje. Nakon toga, vanredni profesor Goran Ćurić održao je predavanje o ulozi finansijskih resursa u političkom djelovanju te otvorio diskusiju o odnosu ekonomije, politike i medija. Drugog dana, 16. aprila, Jasmin Alić održao je predavanje pod nazivom „Kako izgraditi lični brend?“. Kroz interaktivnu prezentaciju i praktične primjere, učesnici su se upoznali s načinima korištenja platforme LinkedIn za izgradnju ličnog brenda. Program je završen radionicama o online imidžu i strateškom pozicioniranju.



# STUDENTSKA KONFERENCIJA 2026

By IROUNMO

U periodu od 13. do 14. aprila 2026. godine, Univerzitet „Džemal Bijedić“ u Mostaru bio je domaćin i organizator Studentske konferencije pod nazivom „Privredni sistem u Bosni i Hercegovini između stvarnog i deklarativnog“, u saradnji sa Unijom studenata i Pravnim fakultetom. Konferenciju je otvorila prorektorica za naučnoistraživački rad, vanr. prof. dr. Amela Piralić, dok se prisutnima obratila dekanica Pravnog fakulteta, prof. dr. Amra Jasarbegović. U ime organizatora, učesnike je pozdravio predsjednik Unije studenata, Amar Obradović. Prof. dr. Edin Rizvanović održao je uvodno predavanje, upoznavši studente s ključnim aspektima savremenog pravnog i poslovnog sistema. Na to su se nadovezali pravni stručnjaci koji su podijelili svoja iskustva i studentima približili praksu iz stvarnog okruženja. Među predavačima su bili tužilac Kemal Maksumić, advokatica Nada Dalipagić i sudija Alen Džaferagić, koji su održali zapažena izlaganja. Konferenciji su prisustvovali studenti pravnih fakulteta iz cijele Bosne i Hercegovine, uključujući Bihać, Tuzlu, Zenicu i Sarajevo, kao i studenti Sveučilišta u Mostaru. Interaktivni dio programa uključivao je analizu slučajeva i diskusije sa asistentima i moderatorima. Drugog dana konferencije organizirano je simulirano suđenje u sudnici Kantonalnog suda, gdje su studenti učestvovali u rješavanju unaprijed pripremljenog hipotetičkog slučaja.





## 24. MEĐUNARODNA MSA KONFERENCIJA ODRŽANA U BUDVI

By IROUNMO

Montenegrin Sports Academy organizovala je 24. međunarodnu konferenciju u Budvi u periodu od 16. do 19. aprila 2026. godine. Konferencija je realizovana u saradnji s međunarodnim partnerima, uključujući European College of Sport Science, World Health Organization Regional Office for Europe (HEPA Europe), kao i univerzitete i fakultete iz regiona i šire Evrope. Montenegrin Olympic Committee nastavio je svoju dugogodišnju ulogu partnera konferencije. Montenegrin Sports Academy će sve prezentirane radove objaviti u međunarodno priznatim naučnim časopisima: Montenegrin Journal of Sports Science and Medicine, Sport Mont Journal i Journal of Anthropology of Sport and Physical Education. Na konferenciji su učestvovali i predstavnici Nastavničkog fakulteta. Dekan, Ekrem Čolakhodžić, voditelj doktorskog studija kineziologije, Damir Đedović, te doktorand i viši asistent Dženan Šuta predstavili su sljedeće radove:

- Čolakhodžić, E., Đedović, D., Šuta, Dž., Aličić, F.: Analiza efekta relativne dobi (RAE) kod golmana u fudbalu različitih nivoa takmičenja u Bosni i Hercegovini
- Đedović, D., Čolakhodžić, E., Šuta, Dž., Kajtaž, A.: Planiranje i upravljanje godišnjim ciklusom treninga u vrhunskom plivanju – studija slučaja



# IROMAG



/iro.unmo



@iro.unmo



/iro.unmo

IROMAG TEAM  
MIRSADA BEHRAM  
LEJLA ŠKALJIĆ  
AMILA VRTIĆ

